

և բուն փոթորիկ մը ծայր տուաւ, հարաւ - արեւմտեան անձրև մըն էր որ կը թափանցէր ամենէն զօրաւոր պատերու մէջ. քանի մը ժամէն ջրհորները լեցունեցան:

Ազօթքը վերջացնելով՝ սուրբը ոտքի ելաւ և խօսքը ուղղեց բազմութեան. Տէրը լսեց ձեր ազօթքը և կատարեց ձեր խնդրանքը: Ամէն տարիէ աւելի պիտի օրհնուի այս տարին: Ուշագրութիւն ըրէք ձեզի, եւ ձեր բարի գործերով փառաւորեցէք զԱստուած որ զթաց մեզի: Այս խօսքերու միջոցին ալ անձրեւին տեղատարափը կը շարունակուէր, և այնչափ երկար ժամանակ, որ Եւթիմիոս ստիպուեցաւ յետաձգել իր մեկնումը դէպի Անապատ. ինչպիսի օրհնուած տարի մը եղաւ նոյն տարին (Անդ. էջ 170 - 171):

3. Խան Հաբրուր կամ բարի Սամարացիին պանդուկը. — Բեթանիայէն վերջ, իբր սուրբգրական տեղ կը հանդիպինք Երիքով երթալիք ճանապարհին վրայ. այս տեղէն է որ կը սկսի Երուսաղէմ գալիք հին ճանապարհը, որուն կը հետեւէր մեր Տէրը երբ Երիքով կ'երթար և կամ անկէ՝ Ս. Քաղաք:

Բարի Սամարացիին պանդուկը նորոգուած է, բայց բակին մէջ կը տեսնուին հին որմերուն մնացորդները գեղեցիկ, նուրբ և բազմազոյն, բազմաթիւ մողայիքի յատակներով՝ ԺԲ. դարու հնութեամբ: Պանդուկն ունի քաղցր ջուր մը:

Աւանդութիւնը հոս կը տեղականացնէ այն պանդուկը ուր Առակին բարի Սամարացին իր վիրաւորեալը յանձնեց պանդուկապետին (Ղուկ. Ժ. 30 - 37):

4. Քոզիբայի վանքին աւանդութիւնը. — Երուսաղէմէն մինչև Քոզիբա տասն և հինգ վերստ է. ան կը